

Kongres Profesor Negara Julung Kali Diadakan Di Malaysia

Unit Komunikasi Korporat

Telah Dihantar: 18 Jun 2011 12:19

Kepada: UUM - All Staff; UUM All Students

18 JUN 2011/16 REJAB 1432H

=====

"UUM : UNIVERSITI PENGURUSAN TERKEMUKA"
(THE EMINENT MANAGEMENT UNIVERSITY)

Oleh: Hasniza Mustafa

Gambar Oleh: Muhammad Shamsul Shafie

KONGRES PROFESOR NEGARA JULUNG KALI DIADAKAN DI MALAYSIA

UUM ONLINE: Lebih 1,000 profesor dari seluruh negara akan menghadiri Kongres Profesor Negara yang julung-julung kali diadakan di Malaysia pada 6 hingga 7 Julai ini di Putra World Center (PWTC), Kuala Lumpur.

Tujuan kongres diadakan adalah untuk mengemukakan resolusi Kongres mengenai agenda transformasi negara kepada kerajaan.

Kongres yang dianjurkan oleh Majlis Profesor Negara (MPN) ini dilaksanakan sempena setahun penubuhan MPN pada 1 April 2010 dan juga menjadi wadah kepada para profesor untuk menjalinkan kerjasama yang merentasi disiplin ilmu dan institusi.

Pengarah Kongres Profesor Negara, Prof Datuk Dr Mohamed Mustafa Ishak berkata, kongres ini akan membahaskan agenda transformasi negara daripada perspektif ilmu sejagat, sains kemanusiaan dan sains semulajadi.

Beliau berkata, kongres ini akan dirasmikan oleh Perdana Menteri, Datuk Seri Najib Tun Razak dan majlis perasmian penutup akan dilakukan oleh Timbalan Perdana Menteri, Tan Sri Muhyiddin Yassin.

Menurutnya, turut menyumbang buah fikiran dalam kongres ini ialah bekas Perdana Menteri, Tun Dr Mahathir Mohamad.

"Mahaguru bidang pengurusan iaitu Prof Dr Micheal E Porter, dari Harvard Business School, University of Harvard akan turut berkongsi pengalaman dan idea dalam kongres ini," katanya.

Selain itu, Professor Nay Htun yang juga UN Asistant Secretary General dan seorang sarjana antarabangsa dari Myanmar juga akan berucap dalam kongres yang sama.

Kongres yang berprofil tinggi serta mempunyai impak yang besar itu akan menjadi satu sejarah kepada negara dan akan dihadiri oleh Menteri Kabinet, Ketua Setiausaha Kementerian dan Naib-naib Canselor Institusi Pengajian Tinggi Awam dan Swasta serta tokoh-tokoh korporat negara.